



ԼՈՒՐԵՐ ՆԵՐՔԻՆ ԹԵՄԵԻՒՑ

Սույն թվականի դեկտեմբերի 12-ին, Ս. Հակոբ Մծբնա Հայրապետի տոնի առիթով, Արտաշատի Մրգավան գյուղի Ս. Հակոբ եկեղեցում տեղի ունեցավ հանդիսավոր ս. պատարագ: Պատարագիչն էր Մայր տաճարի լուսարարապետ Ս. Հուսիկ արքեպ. Սանթրոյանը:

Ս. Հակոբի տոնին նվիրված պատարագին ներկա էին Հայաստանի տարբեր շրջաններից եկած բազում հավատացյալ ուխտավորներ:

Օրվա տոնի առիթով տեղի է ունենում նաև քահանայական ձեռնադրություն:

Պատարագիչ Ս. Հուսիկ արքեպիսկոպոսը, խարտավիակությամբ Ս. Գեղարդ վանքի վանահայր Ս. Եղիշե քնն. Սարգսյանի, Ս. Գեղարդ վանքի համար քահանա է ձեռնադրում հոգևոր ճեմարանի Բ լսարանի սաներից դպիր Աշոտ Պետրոսյանին և վերանվանում նրան Ս. Հակոբ քահանա:

Ս. պատարագին ներկա էին Արարատյան թեմի քահանայից դասը, թեմական և եկեղեցական խորհուրդների անդամներ:

Ս. Հուսիկ արքեպիսկոպոսը ձեռնադրությունից հետո խոսում է խրատական մի քարոզ օրվա ձեռնադրության առթիվ և Ս. Հակոբ Մծբնա Հայրապետի ուսանելի սուրբ վարքագրության մասին:

Ս. Հակոբ նորընծա քահանան Ծնվել է 1956 թվականի հունվարին, Երևանում: 1974 թվականին ավարտել է Երևանի համար 24 երեկոյան միջնակարգ դպրոցը և նույն թվականին ընդունվել հոգևոր ճեմարան: 1980 թվականի դեկտեմբերի 25-ին ձեռնադրվել է սարկավագ:

*
* *

Սույն թվականի դեկտեմբերի 27-ին Աշտարակի Ս. Մարիամե եկեղեցում մատուցվում է ս. պատարագ, որին ներկա էին Արարատյան թեմի առաջնորդական փոխանորդ Ս. Արսեն եպս. Բերբերյանը, փոխանորդի փոխանորդ Ս. Գարեգին արք. Ներսիսյանը, տարբեր եկեղեցիներից քահանա հայրեր, ուխտավորներ:

Ս. պատարագը մատուցում է Ս. Կոմիտաս արք. Հովնանյանը:

Այդ օրը լրանում էր Ս. Մարիամե եկեղեցու կառուցման 700-ամյակը: Ս. Արսեն եպիսկոպոսը, «Հայր մեր»-ից առաջ, հավոր պատշաճի քարոզ է խոսում և անդրադառնում եկեղեցու շինության ու դրա կատարած հոգևոր, մշակութային դերին մեր ժողովրդի կյանքում: Ապա կատարվում է հոգեհանգիստ՝ «վասն եկեղեցի շինողաց»:

